

Aparte di garantiza pa Baby Beach y Rodgers Beach keda publico

Partido RED kier stimula ‘small boutique hotels’ den area di Seroe Colorado

ORANJESTAD - E refinaria Valero a cera su portanan definitivamente como refinaria segun lider di partido Red Democrático Rudy Lampe. Un tradicion di casi un siglo di refinaria na Aruba a pasa pa historia y ta un momento difícil pa hopi famia di trahadornan cu a keda sin trabao. Ta bay ta un Pasco scur pa San Nicolas, ni maske cuanto gobierno gasta den kerstboom ilumina den bario. Gabinete Mike Eman no a cumpli cu San Nicolas.

Aruba lo ricibi hopi turista rond mundo na San Nicolas, kendenan lo keda den e small boutique hotels di Colony y lo bin un desaroyo turistico nobo pa San Nicolas. Laga nos no lubida cu San Nicolas tin e tradicion aki caba: antes den Colony tabata situa e hospital di Lago, un area ideal pa tur-

istanan cu ta ricibiendo tratamiento cu cannabis medicinal por descansa.

Inclusive na Merca tres estado ta legalisa cannabis hasta pa uso recreacional. Ya tin 17 estado na Merca cu a legalisa cannabis pa uso medicinal. Awor Colorado, Oregon y Washington DC ta bay un stap

mas leu despues cu e referendum a sali na favor pa legalisa cannabis pa uzo recreacional. E pueblo a bisa SI na cannabis. Tur hende na Aruba por a sigui e noticia aki via CNN, mientras tabata spera resultado di eleccion presidencial. Presidente Obama, y henter mundo ta contento cu su re-

eleccion, tambe na favor y e expectativa ta cu e lo cambia e ley federal pa legalisacion di cannabis. E opinion publico na Merca rapidamente ta cambiando na favor di legalisacion di cannabis. Aruba, cu ta depende di turista Mericano, ta next y RED lo pusha den e direccion aki. □

PROGRAMA DI RED

E programa di RED pa eleccion 2013 y aproba dor di su miembrecia ta bisa lo siguiente pa loke ta futuro di San Nicolas: “Lo stimula ‘small boutique hotels’ den area di Seroe Colorado garantizando cu Baby Beach y Rodgers Beach ta keda publico. RED ta contra construccion di hotel grandi, pero hotel chikito luhoso ta pas cu e area di Colony y ta pas cu nos meta di promove turismo medico.” (www.red-aruba.org)

AREA CONTAMINA

Nos tur sa cu e area di e refinaria ta hopi contamina y ta sumamente costoso pa limpia e area aki. Por el momento ta mas realistico pa laga e area aki como un zona industrial. Pero loke si ta realistico ta construccion di small boutique hotels den area di Colony. Combina cu promocion di turismo medico na San Nicolas lo garantisa un estimulo pa mas hende bay establece na San Nicolas, mas tienda lo habri y lo duna bida na San Nicolas.

CENTRO ONCOLOGICO

Nos plan ta pa IMSAN bira un centro oncologico cu ta trata patientnan rond mundo cu cannabis medicinal. A caba di sali den Aruba Today (3 di november 2012, pag. 12): “Israel pushing ahead in medical marijuana industry”. E articulo ta cita e minister Juri Edelstein di e gobierno israeli: “When push comes to shove, and people see how suffering people are benefitting, I’m sure everyone will get behind it”. E ta referiendo na e hecho cu gobierno di Israel ta promoviendo e industria di cannabis medicinal pa trata specialmente patientnan di cancer. Aruba su clima ta igual cu di Israel, hopi solo poco awa, un clima ideal pa cultiva cannabis medicinal.